

**Nunat Avannarliit Killiit Siunnersuisoqatigiiffiata aalajangersagaa nr. 4/2009 Inatsisartunit taperserseqarnissaa pillugu Inatsisartut aalajangiiffigisassaattut siunnersuut, aalajangersagaq ima oqaasertaqarpoq:**

**Nunani avannarlerni killerni ungasianit ilinniartitsineq pillugu pisortigoornerusumik suleqatigiinnermik misilittagaqarfiusussamik tunngavissiisumillu misiligutitut suliniummik aallartitseqqullugit Islandimi, Savalimmiuni aammalu Kalaallit Nunaanni naalakkersuisut Nunat Avannarliit Killiit Siunnersuisoqatigiiffiannit kaammattorneqarput.**

*Aallartitat siulittaasuannit Josef Motzfeldtimut saqqummiunneqartoq*

**pillugu**

**Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap**

### **ISUMALIUTISSIISUTAA**

**Siunnersuutip aappassaancerneqarnerani saqqummiunneqartoq**

Ataatsimiititaliap suliarinninnermini ukuninnga inuttaqarpoq:

Harald Bianco, Inuit Ataqatigiit, siulittaasoq  
Andreas Uldum, Demokraatit, siulittaasup tullia  
Juliane Henningsen, Inuit Ataqatigiit  
Doris Jakobsen, Siumut  
Ruth Heilmann, Siumut

UKA 2010-mi ulloq 7. oktober siullermeerinerup kingorna ataatsimiititaliap siunnersuut misissorpaa.

#### **Siunnersuutip imarisaa siunertaalu**

Nunani avannarlerni killerni ungasianit ilinniartitsineq pillugu pisortigoornerusumik suleqatigiinnermik misilittagaqarfiusussamik tunngavissiisumillu misiligutitut suliniummik aallartitseqqullugit Islandimi, Savalimmiuni Kalaallillu Nunaanni naalakkersuisut siunnersuutikkut kaammattorneqarput. Siunnersuutikkut anguniarneqarpoq ilinniartitsisut kalaallit savalimmiullu Islandip Universitetiani Ilinniartitaanermut Iisimatusarfimmut ilanngussinnaanerat tassangaanniillu ungasianit ilinniartitsineranut peqataallutik.

Misiligummik suliniummit misilittakkat Islandimi, Savalimmiuni Kalaallillu Nunaanni naalakkersuisut akornanni pisortatigoortumik suleqatigiinnissamat tunngaviliinissaat, tamatumalu kingorna suliaqarfiit amerlanerusut ilanngunneqarsinnaanerat anguniagaavoq.

**Siunnersuutip Inatsisartunit siullermeerneqarnera**

Siunnersuut nalinginnaasumik tapersersorneqarpoq.

**Ataatsimiititaliap siunnersuummik suliarinninnera**

Ilaatigut ungasianit ilinniartitsineq aqputigalugu ilinniagaqarnissamut ilinniaqqinnissamullu amerlanerit periarfissinnissaannik anguniagaqarneq ataatsimiititaliamit tunngaviummik tapersersorneqarpoq. Nunarsuarmi ilinniartitaanermik pingaartitsisumi Kalaallit Nunaat nunarsuarmioqataavoq, nunarpullu nunanut allanut nallersuussinnaasariaqarpoq. Innuttaasut amerlassusiannut sanilliullugu nunatta isorartunera klassimik ingerlatsilluni nalinginnaasumik ilinniartitsinissamut toqqaannanngikkaluamik aporfissiisinnaammat IT-mi teknologiip ineriartornerata atorluarsinnaanera assut pingaaruteqarpoq. Ungasianit ilinniartitsineq aqputigalugu amerlanerit piginnaasaminnik inerisaanissaat ilinniarnermilluunniit naammassinninnissaat periarfissinneqassaaq.

Ilinniartitseriaatsit inerisaaviginissaannut misilittakkanik paarlaasseqatigiinneq aammalu ungasianit ilinniartitsinermik neqerooruteqarnermi Islandimiut misilittagaasa atorluarneqarsinnaanerat pingaaruteqarmat ataatsimiititaliamit oqaatigineqassaaq. Ungasinnerusoq isigalugu ungasianit ilinniartitsinermik nunatta neqerooruteqarsinnaaneranik tamanna aqputissiuussinnaavoq.

Suliniutip piviusunngortinneqarnerani nunatsinni ilinniarfiit, tassungalu ilanngullugu Ilinniarnermik Ilisimatusarfiup aammalu Perorsaanermik Ilinniarfiup Naalakkersuisunit akuutinneqarnissaat pingaartinneqarpoq. Assersuutigalugu isumaliutigineqartariaqarpoq nunatsinni ilinniartitsisunut pikkorissartitsinissamik neqeroorutit piusut pilersaarutaasullu Islandimit ungasianit ilinniartitsinermiit qanoq pitsanngorsarneqarsinnaanersut.

Misiligummik suliniummit misilittakkat ilinniarfigineqarnissaat qulakkeerneqarsinnaaqqullugu suliniutip qanoq piviusunngortinneqarnissaa Naalakkersuisunit isumaliutigeqqissaarneqartariaqarpoq. Tamatumani pineqarput angusassatut piunasaqaatit, suliniummik naliliinissaaq aammalu ungasianit ilinniartitsinermi suleqatigiinnerup ingerlaqqinnissaanut periusissaaq. Ungasianit ilinniartitsinerup siunissami pisortatigoortumik ingerlanneqarnissaani aningaasatigut kingunerisassat immikkut qulaajarneqartariaqarput, tassungalu ilanngullugu nunat tamalaat suleqatigalugit ungasianit ilinniartitsinermik neqerooruteqarnermi inuiaqatigiit aningaasartuutissaat aammalu ungasianit ilinniartitsinerup aningaasalersorneqarnissaa siunissami qanoq qulakkeerneqassanersoq.

Ataatsimiititaliap paasisai malillugit internetimik atuineq ilinniartut ilinniarfiillu ilinniartitsinikkut nutaanik periarfissinneqarnerannik nassataqarpoq. Tassunga atatillugu Nunatsinni internetimik atuinnermi akeqartitseriaatsip maanna atuuttup ungasianit ilinniartitsinermik atuullutik ilinniartunut ataasiakkaanut annertuumik aningaasartuuteqaataasinnaanera Naalakkersui-

sunit ilanngullugu eqqarsaatigineqartariaqarpoq. Naak ungasianit ilinniartitsinermi siunertari-  
neqaraluartoq ilinniaqqinnissap sutigut tamatigut aningaasaqarnikkullu pisariinnerulernissaa.

Misiligummik suliniutissaq assut soqutiginarpoq aammalu nunat tamalaat akornanni ilinniar-  
titsinikkut suleqatigiinnissamut tunngaviliisinnaalluni. Taamaattumik suliniutip ingerlanne-  
qarnera killiffialu pillugit Naalakkersuisunit ingerlaavartumik ilisimatinneqartarnissaq ataatsi-  
simiititaliamit kissaatigineqarpoq.

### **Siunnersuutip aningaasatigut kingunissai**

Kontop 40.94.15-imut, Nunat Avannarliit Killit suleqatigiinnerannut tunngasumut, aningaasa-  
liissutaasut iluini misiligummik suliniut aningaasalersorneqarsinnaasutut naatsorsuutigineqar-  
toq Naalakkersuisut paasissutissiissutigigaat ataatsimiititaliap maluginiarpaa.

### **Ataatsimiititaliap inassuteqaatai**

Oqaaseqaatit siuliani allassimasut siunnersuutillu siullermeerneqarnerani oqaatigineqartut  
tunngavigalugit siunnersuut **akuerineqassasoq ataatsimiititaliap isumaqatigiittup** inassuti-  
gaa.


Taama oqaaseqarluni isumaliutissiissumilu allassimasutut paasinnilluni ataatsimiititaliap  
siunnersuut aappassaaniigassanngortippaa.




Harald Bianco



Andreas Uldum,



Ruth Heilmann



Juliane Henningsen



Doris Jakobsen